

兩
浙
金
石
志

兩浙金石志卷七

揚州阮元編錄

宋佛牙贊

仁宗神文聖武明孝皇帝製

三皇抱質皆歸土五帝潛形已化塵夫子域中誇是聖老
君世上亦言真理軀祇見空遺塚何處將身示後人唯有
吾師金骨在曾經百鍊色長新

大宋紹聖改元甲戌歲乙亥月敬刊于杭州慈雲嶺永壽
石佛殿之左山崖之前上報四恩將傳萬世沙門釋惟性
建住持沙門寶誠陶謹刻字

右在慈雲嶺石佛院摩崖正書五行行十四字徑四

寸跋字二行徑一寸額正書三字徑九寸按宋諸帝製咸淳臨安志備錄無遺此贊則不載細觀石壁額上有新建鎮國資延遐齡石像之記十二篆字左龕石佛三軀上飾散花天女等極奇古是當時有造象記刻此石篆字是其題額也又臨安志云是寺建於天福七年吳越王所作舊名資賢今額所題新建鎮國云云顯然吳越所刊特舊志誤資作贊咸淳志誤延作賢耳佛牙一贊當是宋時所刻無疑

宋淨土院釋迦殿記

杭州臨安縣淨土院新建釋迦殿記

臨安吳之臨水縣也晉武始更名焉梁開平中改爲安國

而今則因用晉名臨安之盛肇於晉永和申許遠游發之
始自桐廬移入西山登巖茹芝有終焉之志故嘗遺王羲
之書云自山陰南至臨安多有金堂玉室仙人芝草左元
放之徒漢末諸得道者皆在焉由是臨安山水之名爆聞
於時卓卓與羅浮天台埒矣唐之末世實生具美爲武肅
王至其氣象先見於牛斗間則其地勢之雄奇可知矣武
肅旣貴乃名其城爲安國衣錦軍而錢氏兼有吳越四世
相授歷唐晉漢周襲王爵者幾百年不亦盛哉逮 真人
勃興四表臣妾錢氏知天命之會達人事之變鑒諸國之
桀鰲兵連禍結卒墟其宗廟於是東兵卷甲納境効順吳
越之民賴以不見屠戮之傷而室家相保完安至今者此

錢氏之遺德也方錢氏之貴也奉佛尤篤其塗獲棟宇極丹漆之華雕飾龍像窮金木之珍臨安又其故里也崇建梵宇比宅邑爲尤多凡一山之勝一水之麗必建立浮屠宮故百里之境而佛刹幾百數其間最盛者南宗徑山是也分 氏之一支爲如來之別子流教演道是爲法雄其餘則鱗張翼舒相夸紺園星羅綦布咸號精舍以故家家務乎薰脩人人習乎歌嘏亦可以爲樂土矣縣之東南隅左倚功臣右帶石鏡曰淨土者乃故武肅王之子僧統慧日普光大師法號令因之塔院也以寶大元年十二月九日歸窆于塔實嚴香刹以奉供養而歲久堙圯棟梁弗支住院僧其瑩與其徒德全惠普者痛其頽沒相與合謀而

作新之惟惠普者□□精進勇銳錙求銖斂鳩工聚材彌
歷寒暑經始於元祐四年己巳之正月而告成於紹聖元
年甲戌九月二十二日之庚申噫亦已勤矣夫臨安壤地
狹隘生齒夥繁而佛寺相望其徒之多無慮千數故土木
之費齋供之給取之土人力有不贍而檀施尤難得若其
弊而增飾闕而苴補者已艱其力矣又況於基構寶殿延
袤門閣費且若干非其有不惰之勤不退之勇毅然以莊
嚴佛土爲己洪願者其能終此利緣勝果邪嘗聞世尊說
若能補故寺是謂二梵之福惠普師能此其於補故寺之
功不啻十百矣予甚嘉之故因其請記落成之歲月而喜
爲之書若夫佛之所以攝受者實相非實相善法非善法

與夫人之所以歸依者布施非布施福德非福德此乃如
來之真語所以詔後世者故予皆略而不著紹聖二年四
月望日記 同句當造殿行者法惣募緣開石 縣尉鄒
起撰新授明州定海縣尉駱閔書右班殿直監茶稅張安
泰篆額主簿朱世儒縣丞毛寬三班奉職監酒務魏珣左
宣德郎知縣事徐濟立石

右在臨安縣淨土寺正書刻于後唐普光大師塔銘
之陰按寺在縣南二里十國春秋云吳越大寶四年
武肅王捨安國縣宅基爲寺請額于梁曰光孝明因
咸淳臨安志云宋大中祥符元年改今額卽淨土寺
也首云臨安吳之臨水縣晉武始更名焉不知唐時

仍名臨水唐書地理志武德七年潛州領臨水縣元和郡縣志垂拱四年巡撫使狄仁傑奏復置臨水縣是也中述臨安山川之異自晉已著篤生偉人尊崇釋氏百里之境而佛刹幾百淨土寺又爲僧統令因之塔院尤當作新此惠普之精進勇銳功烈最著者也慧日塔銘作慧因必有一誤縣尉題名等六人舊志無一載者

宋越州修城隍廟碑

越州新修城隍廟記

夫人神相因城隍神保釐一州猶太守也越爲督府爲守者得總制一路視古方伯連帥而州治因山以爲基有若

迫窄然以楹計之無慮千數危樓傑閣虛堂廣榭錯起於山之上下而城隍神廟在山之西距州治百步支離罅漏虞於壓覆不足以妥神而像塑失工不能含見威神風薄塵空顏色服章晦慘剝裂謁者或怠見於色無以感格靈貺紹聖丁丑孟夏

龍圖翟公

思

來治州事始至之三日公使庫負民錢百萬燕

衍以時饋遺有節不閱歲既以其贏盡償所負以紓民匱乏於是徹城隍廟而新之高明靚深環以門廡神位其中左右以序損益潤色各擅其相凜然人望而畏之按越自隋末始遷子城於此榛莽不治至唐右衛將軍龐公玉始營州治且有善政其死州人德之祀以爲城隍神梁開平

二年錢鏐表上之詔封崇德侯鏐以詔刊石揭于廟然其事不見於書傳鏐得其詳疑有所自子曰丘之禱也久矣曰翟公方在隱約已不妄交際毅然自任以天下之重識者許之東南學者從公問學唯恐後蓋公所養如此故能爲曰朝廷識拔一爲諫官三爲御史信其所學不以聲利易其操克有終始爲世司直自元豐歷元祐紹聖幾二十年朝廷屢更執政大臣自非取舍未始或同當是時士由州縣獵取貴顯者多矣甚者致位公相而斥逐隨之公每以公議在選中而卒亦齟齬不合然亦不失爲臺閣耆舊偃息方免觀公出處則其禱久矣新是廟非以徼福也肅恭神明理適然爾詩曰靖共爾位好是正直神之聽

之介爾景福公雖無意于徼福神其舍諸方且介以景福而申之以難老日新而未艾也廟成于戊寅五月戊申而丁丑季冬癸卯經始之日也越州蕭山縣主簿吳頤謹記知錄事參軍王仲勇書 趙琪刊

右碑篆額四字文正書十八行在紹興府臥龍山城隍廟卽刻于崇福侯廟碑陰文載州治因山爲基而廟在山西距州治百步今廟在山上不知何時所徙龍圖翟公思紹聖四年任建中靖國元年再任以諫官御史爲世司直又云新是廟非以徼福肅恭明神理適然爾皆立言有體而吳頤之名新志始據是碑補入幸矣

宋趙良器等題名

元符改元六月廿三日趙良器弟仲琳姪持國李聖美高適正同遊從容久之

右摩崖正書左行六行行五字徑寸餘

宋慈雲寺普會寶塔記

杭州承天寺僧祖迨奉募清信弟子謹施淨財建東城慈雲禪院僧俗普會寶塔一所集茲殊利奉爲四恩三有法界含生俱仗妙緣咸登覺地時大宋元符二年歲次己卯正月十五日僧祖迨謹記本院首座僧修度僧祖還句當住持口法沙門道清

右在慈雲寺殿前正書十一行行字不等寺始末詳

甲乙傳流景定五年碑此記則募緣常語也

宋游茂先定山慈嚴院題名

建安游茂先行按浙東晚宿慈嚴元符二年八月二十六日男杵侍行

右在定山摩崖正書四行字徑一寸左行款字正書
在左游茂先又有天台觀碑陰題名云建安游茂先
遊福聖觀濺珠亭觀瀑布紹興四年九月題去此題
三十六年矣

宋重立大悲成道傳

前闕行數不可計

臣旣至妙善聽命卽謂尼衆汝等速避吾當受誅妙善乃

出就死將嬰刃次龍山山神知妙善大權菩薩將證道果
救度衆生無道父王誤將斬首以神通力

下缺

冥暴風雷

電攝取妙善置於山下使臣旣失妙善所在馳奔奏王王
復驚怒驅五百軍盡斬尼衆悉焚舍宇夫人王族莫不慟
哭謂女已死欲救無及王謂夫人曰勿哀哭此少女者非
我眷屬當是魔怪來生我家朕得除去妖魔甚可爲喜妙
善旣以神力攝至龍山之下環視無人卽徐步登山忽聞
腥穢又念山林幽寂安有

下缺

氣山神化老人見妙善曰

仁者欲往何所妙善曰我欲入此山脩道老人曰此山之
中乃鱗介羽毛所居非仁者脩行之地妙善曰此名何山
曰龍山也龍居此故以名之此去西嶺若何曰亦龍所居

是故謂之小龍山惟二山之中有一小嶺號曰香山此處
清淨乃仁者脩行之地妙善曰汝是何人指吾居處老人
曰弟子下缺人也乃此山神仁者將證道果弟子誓當守
護言訖不見妙善乃入香山登頂四望閭無人蹤卽自念
言此處是吾化緣之地故就山頂葺宇脩行草衣木食下
缺知已三年矣爾時父王以是罪業故感迦摩羅疾徧於
膚體寢息無安竭國妙醫不能救療夫人王族夙夜憂念
一日有異僧立於內前曰吾有神方可療王病下缺聞語
急以奏王王聞召僧入內僧奏貧道有藥救王疾病王曰
汝有何藥可治吾病僧曰貧道有方應用兩種大藥王曰
如何僧曰用無嗔人手眼可成此藥王曰母戲論取人手

眼寧不嗔乎僧曰王國有之王曰今在何處僧曰王國西南有山號曰香山山頂有仙人脩行功著人無知者此人無嗔王曰如何可得其手眼僧下缺它人莫求惟王可得此仙人者過去與王有大因緣得其手眼王之此疾立愈無疑王聞之乃焚香禱告曰朕之大病果獲痊平願此仙人施我手眼無所吝惜禱下缺卽令使臣持香入山使臣至已見茅庵中有一仙人身相端嚴趺坐而坐卽焚妙香宣王勅命曰國王爲患迦摩羅疾及今三年竭國神醫妙藥莫能治者有僧進下缺用無嗔人手眼乃可成藥今者竊聞仙人脩行功著諒必無嗔敢告仙人求乞手眼救王之病使臣再拜妙善思念我之父王不敬三寶毀滅佛

法焚燒刹宇誅斬

下缺

衆招此疾報吾將手眼以救王厄

既發念已謂使臣曰汝之國王膺此惡疾當是不信三寶

所致吾將手眼以充王藥惟願藥病相應除王惡疾王當

發心歸向三

下缺

乃得痊愈言訖以刀自抉兩眼復令使

臣斷其兩手爾時徧山震動虛空有聲贊曰希有希有能

救衆生行此世間難行之事使臣大怖仙人曰勿怖勿怖

持我手眼還報于王記吾所言使人受之還以奏王王得

手眼深生慙愧令僧合藥王乃

之未及旬日王病悉愈

王及夫人戚里臣庶下逮國人皆生歡喜王乃召僧供

下

缺

謝曰朕之大病

莫救僧曰非貧道之力王無仙人

手眼安得愈乎王當入山供謝仙人言訖不見王大驚合

掌曰朕之薄緣乃感聖僧來救遂左右朕以翼下缺往詣

香山供謝仙人明日王與夫人二女宮族嚴駕出城來入

香山仙人庵所廣陳妙供王焚香致謝曰朕嬰此惡疾

非仙人手眼難以痊除故朕今日親攜骨下缺來詣山中

供謝仙人王與夫人宮嬪皆前瞻觀仙人無有手眼悉生

哀念以仙人身不完具由王所致夫人審問瞻相謂王曰

觀仙人形相頗類我女言訖不覺哽下缺涕淚悲泣仙人

忽言曰阿母夫人勿憶妙善我身是也父王惡疾兒奉手

眼上報王恩王與夫人聞是語已抱持大哭哀動天地曰

朕之無道乃令我女手眼不全下缺痛楚朕將以舌舐

兒兩眼續兒兩手願天地神靈令兒枯眼重生斷臂復完

王發願已口未至眼忽失妙善所在爾時天地震動光明
照耀祥雲周覆天樂發響

下缺

見千手千眼大悲觀音身

相端嚴光明晃耀巍巍堂堂如星中月王與夫人宮嬪親

菩薩形相舉身自撲撫膺號慟揚聲懺悔弟子肉眼不識

聖人惡業障心願

下缺

救護以免前愆弟子從今以往迴

向三寶重興佛刹願菩薩慈悲還復本體令我供養須臾

仙人復還本身手眼完具趺坐合掌儼然而化如入禪定

王與夫人焚香發願弟子供辦香薪聞維聖體還宮造塔

永供養王發願已乃以種種淨香圍繞靈軀投火燃之

香薪已盡靈軀屹然舉之不動王又發願必是菩薩不肯

離

下缺

此地欲令一切衆生見聞供養如是言已與夫人

昇之卽時輕舉王乃恭置寶龕內菩薩真身外營寶塔莊嚴葬于山頂庵基之下與宮眷在山守護晝夜不寢久下
缺歸國重建梵宇增度僧尼敬恭三寶出內庫財於香山建塔十三層以覆菩薩真身弟子蒙師問及菩薩靈蹤略述大指若夫菩薩微密應化非弟子所知律師下缺問香山寶塔今復如何天神曰塔久已廢今浮屠而已人罕知者聖人示跡興廢有時後三百年當重興耳律師聞已合掌贊曰觀音大士神力如是非菩薩下缺願廣大莫能顯其跡非彼土衆生緣熟不能感其應巍巍乎功德無量不可得而思議者命弟子義常誌之實聖歷二年仲夏十五日也

贊曰香山千手千眼大悲菩薩乃觀音化身異哉元符二年仲冬晦日余出守汝州而香山實在境內住持沙門懷晝訪予語及菩薩因緣已而持一編書

下缺

且言此月之

吉有比丘入山風兒甚古衣藍縷問之云居於長安終

南山聞香山有大悲菩薩故來瞻禮乃延館之是夕僧遶

塔行道達旦已乃造方

下缺

晝曰貧道昔在南山靈感寺

古屋經堆中得一卷書題曰香山大悲成道傳乃終南宣

律師所聞天神之語敘菩薩應化之跡藏之積年晚聞京

西汝州

下缺

卽菩薩成道之地故跋涉而來冀獲瞻禮果

有靈蹤在焉遂出傳示晝晝白念住持於此久矣欲求其傳而未之得今是僧實攜以來豈非緣契遂錄傳之日旣

暮僧輒告去固留不止遂行晝日已久矣彼僧何詣命
追之莫知所止晝亦不知其凡耶聖耶因以其傳爲示子
讀之本末甚詳但其語或俚俗豈常者少久而失天神本
語耶然至菩薩之言皆卓然奇特入理之極談予以菩薩
之顯化香山若此而未有傳比予至汝其書適出豈大悲
付囑欲予下缺遂爲倫次刊滅俚辭采菩薩實語著于
篇噫天神所謂後三百年重興者豈在是哉豈在是哉
元符三年歲次庚辰九月朔書

崇寧三年五月二日杭州天竺寺僧道育重立 朱炳口

右碑在紹興府學額正書悲之傳三字徑六寸餘文
二十七行後贊及年月八行皆行書徑五分詳譯文

義及碑額題字其前皆有關文疑當時刻石不止一碑或此碑兩面拓者遺其前耳碑爲崇寧三年杭州天竺寺僧道育重立贊內有元符二年仲冬晦日余出守汝州之語未列姓氏不知爲何人所書

宋錢倩仲石龍院題名

建中靖國元年仲冬會稽錢倩仲游

右在西湖石龍院摩崖正書一行字徑二寸

又瑤華洞題名

彭城錢倩仲辛巳仲冬十八日乘興游瑤華洞

右在龍華山瑤華洞摩崖小楷書六行二題名應卽

同日所刻

宋查應辰等靈隱續題名

後百有四年兵部查公曾孫朝散大夫提舉兩浙常平等
事應辰察推周公曾孫承議郎通判越州軍州事種復同
遊此洞敬觀遺刻實崇寧改元歲次壬午八月二十有八
日也

右在青林洞摩崖正書六行周氏錢塘人王安石有
周氏世德碑在滿覺壠卽此周氏也又東坡年譜元
祐元年有舉江寧府司理問種充學官事此通判越
州紹郡志亦未載

宋查應辰等題名

查應辰靈口尹口微之趙固夢祥吳脩敏甫庚申上元口

游 吳雍子中來

右摩崖題名正書三行行字不等徑二寸餘吳雍一行五字似別一題也按應辰有青林續題名書崇寧改元壬午此書庚申前爲元豐三年後則紹興十年也

宋徽宗辟雍詔碑

朕嘉在昔善天下之俗勸功樂事尊君親上莫不受成於學命鄉論秀比其德行而興其賢能崇德黜惡人有成材逮至後世士失所養家殊俗異未之有革惟我

神考若稽先王建置校學罷黜詩賦訓釋六藝首善於京師矣朕追述

先志夙興夜寐罔敢墜失思與有德有造之士共承之遂
詔所司推原

熙豐三舍之令播告之修誕彌率土卽國之郊作辟廱廢
科舉以復里選之制非聖賢之書與元祐術學悉禁毋
乃 之 臨廱視學延見多士庶以好爵朕心庶幾焉
傳不云乎以善養人者服天下朕之迪士至矣其 應侯
志以從 之欲則將一道德同風俗追成周之隆以駿惠
我

神考豈不遽歟付辟廱

四日

皇帝賜辟廱詔後序

同治三年六月
承議郎試大司成兼

侍講武騎尉保寧縣開國男食

邑三百戶賜紫金魚袋臣薛昂奉

聖旨撰并書

崇寧元年

上總覽庶政慨然欲大有爲將躋斯民咸底于道迺下

詔曰學校崇則德義著德義著則風俗醇其大興學舍于
天下又

詔卽國近郊建置辟廱匠臣抗圖

上曰古者學必祭先師茲聚四方士多且數千宜增殿像
于前徙經閣于後布講席于四隅餘若爾規厥旣得

旨則經營越三年工告成

車駕幸焉祇見

夫子于大成又

詔國子司業臣

綢臣靜曰朕摠至懷親箸翰墨賜之璧水申勸無窮小大之臣下逮韋布鼓舞頌咏咸以覩所未嘗爲幸藏之層構勒之翠琰明年臣靜又請序其後

上命臣昂曰汝其爲之臣不獲辭乃拜手稽首言曰唐虞三代尙矣歷世旣遠教法不存然上下之庠東西之序左右之學與夫東膠虞庠或在國或在郊又曰成均曰米廩曰瞽宗曰辟廱蓋皆設於王都者如此至於鄉遂則又各爲庠序學校嗚呼何其詳且至也秦漢而降治失本原禮樂化微師及道喪人才卑陋有媿成周蓋無足怪

於皇神考稽古御時闢太學建三舍論選有法士變宿學

而新美矣

皇帝陛下祖述憲章咸在

先帝收科舉於學校推三舍于四方肇立司成專遣膚使
燕見訓諭 載色載笑

竊意所屬可謂至矣於是時也士患不學不患無所於學
人患不才不患無以成其才方策所傳歎不可得於

今親見如出其時豈不盛歟然昔備成於積世 今掩

迹于一時昔大比於王畿 今賓興乎海寓非 天

錫

聖上勇智照於理而不惑斷以義而必行則希世墜典豈
易悉舉哉臣待罪從官以總領師儒爲職誠不自揆仰

聖政之丕成慶多士之幸會忘其淺陋昧冒稱述殆以塞明詔焉若夫

雲漢之章 河洛之畫願豈筆舌所能形容彼目擊心

諭得 法象焉則 無爲而成其猶天地歟臣謹序

奉議郎試辟廨司業武騎尉臣何昌言 承議郎守國子

司業兼同編修國朝會要武騎尉賜緋魚袋臣強淵明

朝請郎守國子司業雲騎尉臣汪澥 奉議郎試辟廨司

業臣余深 朝散郎試中書舍人雲騎尉賜紫金魚袋臣

蔣靜 朝散郎試中書舍人飛騎尉賜紫金魚袋臣吳綱

司空尚書左僕射兼門下侍郎上柱國衛國公食邑六

千八百戶食實封二千戶臣蔡 京 奉

勅題額

越州

准辟靡牖檢會崇寧三年十一月十六日 勅

節文 車駕臨幸辟靡 親書手詔下有司

模勒刊石頒賜諸路州學及契勘崇寧四年三月

十六日 勅應諸州學俟頒到 手詔許令

立石 崇寧四年十二月二十日建

將仕郎充州學教授臣朱 登 從事

郎充州學教授臣季 燮 奉議郎通

判越州軍州管句學事兼管內勸農事借

緋臣 直俟

承議郎充顯謨閣待制知越州軍州事提
舉本州學事兼管內勸農使充兩浙東路兵
馬鈐轄兼提舉本路兵馬巡檢公事武騎尉
文水縣開國男食邑三百戶賜紫金魚袋臣
王 資深

右碑在紹興府學大成殿後壁上刻徽宗御書辟靡
詔十四行字徑寸餘筆細如髮全以瘦勁行之所謂
瘦金體是也下刻辟靡詔後序及銜名凡三十一行
字徑一寸按宋史徽宗本紀載崇寧三年十一月甲
戌幸太學遂幸辟廱賜國子司業吳綱蔣靜四品服
推恩有差獨未及頒賜詔書當據此補之詔內建置

校學應是學校之誤播告之條條誤作修

朱林虞題字

度支郎中鮑公嘉祐七年壬寅歲來守吳興畱題名字刻
于□□之山□□□□之口大觀元年丁亥歲□□大口
□□□□□□守下車之初首訪舊題得石刻於墨妙
堂之南得木刻于逍遙堂之北於是會客圖中發□□題
且與虞步至石下拂塵滌字後得我先文節公題字於其
側文節公守湖當元祐二年丁卯歲距嘉祐壬寅凡二十
六年二公所題固有後先而並刻一石若同時者逮今四
十六年而僕卿與虞兩家□□一日偶至石下同覽遺刻
相顧恍然念棠陰之未改槍手澤之猶新感今悲昔乃書

其事于石云大觀元年十二月望日通判州事林虞題

右題名正書十一行刻於太泐石上乃六客堂舊物
也在湖州府署按文似鮑僕卿與林虞兩家先世皆
任湖州守茲因手澤感事續題考舊志鮑氏仁宗時
有湖守鮑當鮑軻二人必有一于斯林氏任湖守者
湖州牧守題名碑有林希注云朝請郎充集賢殿修
撰元祐二年八月云云與碑文頗合當卽其人虞字
季野有元祐七年烟霞洞題名見集中

宋張臺卿等題名

張臺卿莊君猷周民望蔡達道大觀庚寅冬十二月口口
日口口來此

右在吳山武義廟摩崖正書六行字徑三寸按張閣字臺卿河陽人以龍圖學士知杭州見宋史本傳

宋趙口劉燾等明月峽題名

口口趙口劉燾同來大觀口年四月口口

右題名四行行四字正書徑一寸在長興縣顧渚明月峽唐楊漢公題名左側摩崖劉燾字無言長興人誼之子未冠遊太學與陳伯亨稱爲八俊元祐三年進士仕爲秘閣修撰著見南山集

宋正直院碑

聖宋台州靈龜山 勅正直院記

法輪寺瞿曇氏賜紫有威撰

覺皇應跡尙依止於祇洹像教東漸悉崇隆於梵刹昔者
佛初成道瓶沙王率統內官士庶禦于郊野因以伽蘭陀
竹園爲佛寶舍原其伽藍由茲始也爾後歷代諸祖迭興
未嘗不以經律論學爲住持之眉宇焉苟不然則以植福
營利預於科之列靈龜山正直院疇昔舊址在院之前
坡巖崖突岼石徑榛隘庵室數間卑窄猥陋不能容衆是
亦可嗟沙門惟侃髫鬣厭俗有志爲僧默爾介懷終圖遷
革至熙寧初進納剃度稟具已不忘夙志卜地於此始於
元豐三季秋擇日築基首創方丈一所峙峻高顯聳出中
峯卽庚申歲也其年復建法堂一座粗宏壯次於辛酉
冬率籲其衆造寶殿一所疊石爲址高下相映漸而可觀

仍從舊處車載中尊等七身歸就新殿雖半千人工運架
牽挽跋涉迄隴其聖像儼然不動杳無損於纖痕若神助
之來無遲 觀者莫不歎仰復於紹聖二禩乙亥歲建僧
堂一座懺室一區三門兩廊東司浴室鱗次而起崇寧三
季建鐘樓一所簷簷凌空鯨音震谷門外敞橋亭使來者
少休於此卽大觀二季戊子歲而成焉院雖周匝唯厨庫
未備而又罄乎囊餽募彼衆緣於己丑冬建葢畢矣上棟
下宇前後內外油飾悉完又慮洪流漲溪將有衝毀之患
乃倩工負石作岸泄水開田俾其永固最後預立墳亭以
俟其卒偉歟始因一簠終見爲山適遘出于一身蹤跡垂
於千古儻恣情慾撥棄因果飽食逸居不修毫善則永劫

沉淪生死苦海險難惡道欲出無期徒追後悔侃公上人
性淡而純志堅而遠 茲像季而能建立伽藍光顯三寶
區區歲月臺臺忘劬起造已來勩力之外所獲施利悉資
衆用不作已想凡運土木瓦石手攜肩荷折重分輕力同
庸鄙未始憚勞至於冰霜凜骨常穿草屨驅馳奔走不顧
形骸其所存之用心乃取益於後世今之緇倫罕有僭者
人或謂開山祖師之先身耳今得一院鼎新林泉勝景
趣蕭灑若自然化成異日居者恒傲自樂豈知勞績如斯
艱乎福善等於太虛普濟均於沙界足以報在三之義允
昭 國家夙受其福世或有譏造作爲住相排馳神爲
虛妄固執無相爲是而以有相爲非殊不知有相元無妄

生詆訐吾知其泥無相者是亦真有相也謬參哉時政和
改元太歲辛卯二月望日應命敘其歲月云

天台翠屏學教沙門仲能書丹 管內僧正監壇選練傳
教賜紫公濟大師若舟篆額 攝參軍監台州大田局稅
茶鹽務吳興郡姚日拱立石

碑陰

正直院知事僧 惟侃

口乃熙寧六年脫白受具至次年交紹先師小庵山院一
所其院朽損不任整頓立衆難安風水不便遂於元豐三
年標志移就山下選定開基建立院庭永作流通羣生瞻
仰化化不斷佛種現前願心已畢昨所交受住持並無絲

毫穀帛給資財寶什物家事子年年營辦歲歲支持漸而
成矣常住自昔以來係籍水田足圓貳拾畝後於院側四
畔開作水田添數堂厨接待二時及十方凡聖先則雖然
施主捨過物業未係資稅於己未歲五月內蒙本縣曉示
許人請首山捲此 抱狀詣廳陳請山樣下 打量壹伯
伍拾畝永歸常住逐年送資稅其有界至具在于后
東至大蛇直上水源爲界南至舊庵分界西至洋梵嶺及
興福院分水爲界北至山脊爲界

永爲標記以不見聞伏以 佛詞建立者蓋取解脫之義
也登之則有相皆空履之則無爲俱實願茲巨剎最上福
田先則祝扶 今上皇帝聖壽州縣官寮六軍萬姓仍報

四恩普資三有者

政和元年十月日建立開山僧惟侃 徒弟義香義證義

賜紫梵宣梵琦梵安清璉了全 通 齊又富法名

圓淨捨一貫 法名善道捨一貫 陳德智捨伍

伯文 以上碑陰上列

增田紀實

龜峯主者於景定壬戌癸亥二年捐衣資開穀田租計壹拾伍石有餘麤之隨租起者有常式不虛有所入乃實有所謂彼農之春務也此坑燒取殼灰 最急應貸火佃之穀各叁斗問舟之日來請以資其用是憐其窘匱也春務易爲力矣秋收來償依社倉規增二分息吾門之夏也

當今輸送免丁爲尤重助貼僧員之錢各壹緡如官之期
津灰不致其擾足念其難辦也夏土可安居矣凡雲水之
來 山各俵牖金乙拾文以佐其遊方之脚力 者所

謂盡善盡美更祈所入不虧庶無負於王者觀其操守正
行願深交承之初惟 通繁夥四顧荒陋能不憚艱棘極
力起廢 改徙外門徑路縈迴繚垣高峙萬木斯植叢竹
斯茂風水可挽也然後廬宇備葺聖像具嚴鍾鼓繼聲魔
軍遁迹今之龜峯非昔之龜峯矣我等萬幸或際斯時因
紀增田之實登諸石以永其傳故併敘勲德大略主者諱
道常號斷雲受綾帟曰真戒大師城闔人淳祐壬子臘月
住此至今一紀餘三載皆咸淳二禩歲在丙寅結制日敬

書勤舊

若智惟

立石

以上碑陰下列

右碑篆額四字文行書二十六行碑陰上列二十二
行下列十八行俱行書在臨海縣東鄉靈龜山按赤
城志正直院舊名靈龜卽以山爲名前記沙門有威
述惟侃建院始于元豐三年終于大觀二年備錄其
勤勞碑陰上列記侃移置小庵山院一所並資稅捨
錢下列則記增田之事洪筠軒云赤城志大田稅場
在縣東三十里元豐中建觀此結銜茶鹽其所稅也

宋越州新學碑

越州新學記

朝奉郎守尚書度支郎中知越州軍州事兼管內隄堰

橋道勸農提點銀場兩浙東路屯駐泊兵馬鈐轄護軍
借紫張伯玉撰

治平元年夏四月丁卯越州新學成先時學舍近市隘囂
靡寧厥居嘉祐中始於州之東南隅得爽燥地平衍高古
敞然一方喬木渟水有泮林之象焉始作大殿直庠門踴
然徙夫子舊像南面顏充公西嚮配坐東西兩廡圖畫
七十二子洎二十有二先儒孟荀揚文中四子之像其東
廡之後別爲祠堂齋宮一區藏餽祭器益嚴繇殿後越敞
庭夏屋言言環坐重席者可三四揭之曰公堂旦夕講勸
歲時鄉射之宅也繇堂東西翼于庠門列爲齋舍甲乙以
次各有名版學者居多益寧堂東學鼓之南書大榜條其

篇目皆學中規爲之法也諸生服膺無譁望之肅如也庚辰守將伯玉率僚佐泊師儒宿于齋宮辛巳質明用牢醴將幣奉成于先聖先師既徹遂升于公堂與祭者咸坐大約以鄉飲之節發成之于時州人故老堵立而歎曰偉哉學也我髫壯所未睹逮黃髮見之矣成是美俗世爲善良者其在茲乎於是序賓充然而進曰維東南越爲大州今茲學又爲東南最始州將渤海刁侯擇地卜築基之矣會解去繼以紫微吳興沈侯勇爲之僅完矣又易地于杭故遲之凡三年君侯至而成之夫能以近而致遠俾後而知今者莫如言昔者魯僖公叔世之諸侯也能興修學宮國人頌之仲尼興之洋洋之聲到今不絕者言也君侯立

唐虞之朝策名涖官所至以職學爲任宜乎爲我屬爲文
詞刻于金石俾聲于無窮可也伯玉固辭曰惟是寡學不
敏不敢賦且逾月不得免因覃思撫實作新學之詩凡四
章一章十有六句言經始而成之也二章十有六句言來
學之盛也三章十有七句敘學化之流行也四章十有二
句志其悠久抑又禪之也其詞曰

芒芒禹跡越爲大區重山複川不冒海隅浸被王澤悖古
服儒服儒伊何新學鼎成邃殿高閣廣廡修庭有翬其檐
有覺其楹貌聖圖賢炳耀丹青歲時 國祠丕鑠 王靈
夏屋長廊分厥攸居咸有區處式妥其徒其徒來學嚮若
雲合執經而趨震鼓發篋躋于公堂師友攸攝禮樂是將

詩書是業涵泳道真剔剪紛雜俾我善教與時皆洽昔也
學之未成惟君子是營今也告厥成惟庶民是聽父詔于
子弟服于兄曰民之生俚俚冥冥好惡靡別惟學是明昔
我門囂今也和平告我辯訟今也靡爭納于善良協于太
寧繫學校是興稽山崔崔越水漣漪新學有奕君子所作
惟大中是師惟大化是日不黨不渝不蔽不欺俾民弗迷
揭爲聲詩告于後人俾長世無斁思

政和元年十月望日將仕郎充州學教授陸友諒重立石
奉議郎監在城稅務張勸書 刊者董彥

右碑在紹興府學二門西側文廿三行正書徑一寸
文云始州將渤海刁侯擇地卜築繼以紫微吳興沈

侯勇爲之又易地於杭凡三年君侯至成之今以職
官題名攷之刁約以嘉祐五年任沈邁以嘉祐六年
任伯玉踵文通之後以嘉祐八年任經理修學之事
至治平元年落成文中稱君侯者述州人頌已之辭
據前文守將伯玉率僚佐云云可證乃萬歷志竟以
屬之後任章伯鎮並言伯玉以治平元年徙郡去未
及觀新學落成撰文不自書其功者示謙也不知伯
鎮蒞任在治平三年此記作於前一年文中無一語
及後任又何讓功之有此蓋因碑後政和元年十月
重立石一條致誤耳近時新修府志猶仍其謬故特
正之宋詩紀事載伯玉字公逵建安人第進士嘗爲

蘇州郡從事范文正舉以應賢良方正能直言極諫
科嘉祐中爲御史出知太平府後選司封郎中有蓬
萊集據此碑知其嘗守越州府志稱作張侍郎亦誤
宋安吉縣新建東岳行宮碑

湖州安吉縣新建東岳天齊仁聖帝行宮碑

宣德郎監常州犇牛鎮務兼煙火公事彭脩撰 登仕
郎守湖州安吉縣丞管勾學事丁齊書 朝奉郎新差
權發遣秀州軍州管勾學事兼管內勸農事雲騎尉借
緋魚袋劉燾題額

五方皆有名山以作鎮其東曰泰山穹窿嶽崢嶸峩峩
睥睨日曉月軼雲帶霓岌然拔立以傾拭天下之心目又曰

天孫爲天帝之孫又曰岱宗言東方萬物始交代之處其上有金匱玉策知人壽命短長威神所被震爚有耀宗長羣岳會朝百靈夫居杳默冥漠之間察天下善惡之萌蘖而禍福之是必其聰明正直有以運精神之妙參造化之幾故能旋轉乾坤開闢宇宙指揮風雲呼吸雨暘潛行密移變化莫測傳曰山川有能潤百里者天子秩而祭之觸石而出膚寸而合不崇朝而雨徧天下者其唯泰山乎自古聖王莫不光昭祀事史稱封禪之君七十有二秦漢以降窮寵極崇於赫

我宋誕膺顯命

藝祖

太宗聖文神武不假戈革混一區宇民脫五季之毒盤復
見三代之風流

真宗繼承鴻緒用底丕平封秦山之高以報天禪梁甫之
趾以報地剖天神符合地靈契卜年有永卜世無疆

聖聖繩繩炳炳煒煒

今皇帝稟睿聖之資丁熙洽之運以孝事

神考而紹丕顯之謨以弟事

哲宗而述丕承之烈歡交三神道越百王上暨日月星辰
下至山川草木幽及鬼神微逮蟲魚罔不用乂內自九州
外薄四海延頸企踵以承教化生民以來太平之盛未之
聞也惟天祚我 國家昌明隆熙沕涵曼美故其昭

報虔恭寅肅唯恐或後于時山川之載在祀典者泰山爲最尊貴名號視上帝且天下咸得祀之雖窮山幽谷要荒不毛之地皆飾祠嚴奉湖之安吉羣峯回環崿嶷嵒嶺長溪縈帶靡迤溶漫地富絲枲人用饒益豪商傑賈萬里輻輳爲東南大邑宜其架構凌敲多侈宮室繡楹雲栴螭蜎蟻濩以妥安神明而曾無赤寸之地仍歲聚集浮薄爲社送迎而已顧瑣陋不稱跨溪而南有金僊氏之居曰等慈民嘗立嘉應侯以祀之後更塑岳帝之像所荅蠻

省如谷應聲川航陸乘肩摩足疊寺僧戒遇啟思以佛祠非岳帝之所宜居迺施寺西之地俾經營之民大

和會相與鋤治鑿山構基始得圓石背隆面窟渾然天成

不見痕跡上有七星列若斗柄其次二星如相先後而拱于上其次四星兩兩相比考之傳記星隕于地化而爲石寶天以啟于民衷非人能基厥謀地不愛寶發現于外以表休祥貴賤聳觀遠近懼聽貧者施力工者薦巧靡由號召莫不畢至崇寧丙戌夏六月洪水暴漲是用不潰于成因廢爲荆棘瓦礫之場虹梁彫斲丹髹浸剝華墀鈿砌圯缺斯蕪楣顛樁仆垣傾城夷歲時水旱疾疫縣官與邑之士民凡有禱請必造其下載瞻神靈居處不虔迺相與而言曰生人何依惟神是恃福我壽我衣我食我夫夫婦婦父父子子兄兄弟弟神之所以庇祐生人者旣已厚矣而我報不虔神雖莫我悔咎我寧不愧負厥心於是相率復

踵前功凡爲三門兩廡中大殿一寢殿一旁小殿二爲壇
一爲池一高下相望如翬斯飛塗金間碧璘珣璀璨繪畫
鬼神羅列四壁焜焜瀟瀟口若視若言貪愚險狠顧瞻警慄
天旄星旂天矯配藜耽耽渠渠翼與嚴嚴過者下登者拜
明明岳帝如在上下如在左右於是視史跪而告

于令曰惟令在公盡忠教民以孝忠孝之誠格于上下故
時和歲豐民康物阜伊宮之成惟民之力實令之德令承
事郎劉望以語修曰是宮建于元符庚辰十二月己酉通
直郎龔羣經其始成于政和壬辰十一月壬申望落其終
董役辦事者施曄范守瓊俞仲寧范天式施徽等自庚辰
迄于壬辰春秋凡十有三比年以來時和歲豐神之佑于

我

國家也民康物阜

上之所以敷錫厥庶民也祝史不知迺歸德于望甚無爲望何德以堪之望嘗詢作宮之意于民咸曰將祈福于神以報于

上俾盤石之基不拔日日新又日新於萬斯年爲天下主望惟天保之詩曰天保下報上也君能下下以成其政臣能歸美以報其上望不肖獲見民能報

上比隆成周實與榮焉於是相與率賓僚齋心潔誠諏日之良造于宮庭大合樂以落之金石絲竹鏗鏘鏘洋牲腍酒馨神其醉飽祥氛郁郁以顯

帝靈飛廉斂口屏

翳肅馭乾端坤倪清明沆寥神斯盼蠻人心載欣修汾檄

來茲亦更三時聿觀厥成獲與在列謹拜手稽首而敘之
既敘之又爲之詞以遺邑人使歲時薦獻歌以祝

帝詞曰

於穆

皇帝紹休

七聖兮垂拱南面庶政清

淨兮仁洽道豐品物函詠兮百神受職四方無競兮鄩山

蒼

茗溪沄沄兮中建

靈宮揭虔安靈兮風馬

雲車

帝狩於庭兮鳳蓋芬離龍旂崢嶸兮

帝佑

皇帝永主神器兮以臣以妾罄天亘地兮珍

符靈祥日升川至兮授策泰元壽萬萬歲兮

帝惠

我民時和歲豐兮多黍多稌十雨五風兮稍魑魅狂蕩穰
災凶兮孕皐生夔躋世熙隆兮蕩蕩下土

帝司其

職兮蚩蚩之氓孰知

帝力兮

明明岳帝聰

明正直兮欽我民祀與

宋無極兮

政和三年歲次癸巳壬寅朔建

承事郎知

湖州安吉縣管勾學事兼管內勸農公事劉望立石

守

杭州助教范天口施財住持管勾御前賜紫道士虞輔真

表白賜紫戴尹方

右碑文正書三十六行行八十字在安吉縣按祠初

祀于等慈寺寺僧戒遇施寺西地經始之發地得七

星石貴賤聳觀垂成而潰于崇寧丙戌之水凡禱祠

者猶至于是復踵前功而歸美于令歷歲凡十三年

而彭脩文以記之洋洋數千言洵稱作手結銜有煙

火公事又見紹興十年永靈廟碑蔡几衡及唐安隱
寺經幢後紹興庚辰題記李棫衡上

宋徽宗壽光宮宸翰

東京九成宮住持道士虛靜妙通法師項舉之昨乞歸元
受業處州紫極壽光宮可依已降指揮敕遣赴闕不許辭
避仍令劉旣濟躬親敦遣前來違如論違

御筆具知委聞奏付劉旣濟 封

恭以 主上聖文 武 出于 天 度絕今古不可倫

凡日下有被 得 片紙寸墨者莫不

子及孫而 待罪三浙 年 前後 承 凡數

十幅 日月垂光下 室而有日有趾者莫不

而也今年春行秀州詔令諸處之壽光

官敦請虛靜妙通法師項舉之既奉

行凡六日至本宮卽時具袍躬聖訓

訖而本官知抱一師請于

皇帝御刊諸石竊文義其

于一室石萬世於然

之天下學士如山林而

之榮幸也政和七年二月二十日朝請大夫

兩浙計度運兼勸農使賜紫金魚

袋口劉旣濟口口口

右碑額題篆書政和宸翰四字碑分三列上列刻御

書十行行書中列刻劉旣濟下列磨滅不辨一字在
遂昌縣治南瑞山麓元按是時崇道故有此勅前刻
御書後記刻石之由云數十幅當不止此此本宮道
士抱一所刊舊見又有刻于平江府者凡二石勅文
同有御押及御書印側有題款云明教大師同知平
江府崇真壽聖宮事臣鄭子革紹興甲戌下元爲師
祖妙靜項先生重立蓋其徒孫所刻也又有宸翰一
碑書法同是瘦金體文云處道之士純靜虛通歸元
物外塵不可擾斯先生之妙用也賜九成宮住持道
士項舉之應卽記中所云數十之一當時必有刻本
而今亡之也文中有秀州字此當時別院項舉之字

彥昇七歲爲遂昌紫極宮道士大觀庚寅往汴京九成宮會金明池早應詔符召池中龍舉之挺劍結步池水卽涌溢有七巨魚浮水上如北斗之次雨隨沾足詔改紫極爲壽光宮賜殿額及田租政和丁酉召赴闕授紫虛大夫葆光殿較籍爵秩視朝散大夫壽光宮在處州遂昌縣南瑞山之麓縣志云唐葉法善煉丹之地宋元符三年老君像眉端神光見郡邑表聞政和三年降御容于宮宸翰賜額大書紫極壽光之宮六字今存

宋政和間殘題名

弟攝庭闕棠守富闕大壯自闕來遊政和闕月廿九

日開

右摩崖殘字五行行書徑寸餘上半已泐

宋太景洞題字

太景洞

口口都事口口金口口口口口宣和庚子口口口口

右摩崖正書三字徑八寸用飛白筆法左款二行有

紀元數字可識

宋壽聖禪院修建碑

壽聖禪院下闕

朝下缺神霄玉清萬壽宮兼管內勸農事借紫下缺

朝奉下缺神霄玉清萬壽宮兼管內勸農事借緋下缺

天台山水之

下缺

廬縣豆巖谷

樓傑閣勢聳

雲

下缺

傳于江海人

處爲豐厚

招提之

居

下缺

指計者數千

而壽聖斗絕一隅

獨無有焉壽

龍

下缺

唐元和六年建寺

本朝熙寧己未賜今名其經始皆鄉人郭文霸與隣里共

成之歷年滋久

下缺

而寺幾廢政和癸巳太守孫侯之至

也凡境內僧尙踴訟者皆闢爲

下缺

壽聖其一也

禪

梵珪開堂傳道而郭氏子孫能世其業於是

下缺

而入院

之門安經之臺聲鐘之樓置像之殿齋堂禪室廊廡庖廩

率皆完具面

下缺

闢徒衆盛可與大利相儗矣然踴訟之

徒雖嘗屏去而怙終弗悛潛伏田野

下缺

吏之更代則

經營奔走投隙抵巇以罔州縣期於悉復其舊而後已則
相繼爲吏

下缺

豈得置而弗恤乎故因梵珪之請爲記而

叙孫侯始創之勤以告來者無廢前人

下缺

成之績則業

林自此興爭訟自此息而四方釋子所至如歸其爲利也
不亦博哉

下缺

侯名實字若虛姑蘇人云宣和四年二月

旦日記

丹丘王輅模刻

施石 住持傅瀉

僧梵珪建

秉義郎充台州臨海縣杜瀆鹽場亭場巡檢

張瑾立石

修武郎監台州在城房廊

務孟存中書

迪功郎就差充台州司工曹權知臨海縣事陳橐

右碑篆額四字文行書二十行上下皆殘闕在臨海

東鄉郭氏宅地名康功此述孫侯創始修院而梵珪

請記以文也文云僧尙顯訟蓋宋時尊崇釋氏動輒
賜田勅牒當時競爲利藪耳孫實字若虛姑蘇人政
和三年以朝散郎任陳臺字德應餘姚人政和中爲
台州工曹參軍治獄平允更攝臨海天台黃巖三邑
皆以愷弟稱繼知台州洪筠軒云赤城志廣福院舊
名保福熙寧三年改壽聖此稱熙寧己未賜者誤也
宋王競等靈隱題名

王競皇甫彥李聞王慎修俞侯同游 宣和四年三月十
一日

在靈隱後山摩崖正書三行右行字徑三寸款正書
一行字徑一寸餘

宋路公弼等天竺題名

路公弼翁端朝傅國華容古老麥公明孟子與徐明叔宣和五年夏四月己亥同來

右在下天竺摩崖篆書四行字徑八寸按西湖志引書史會要稱徐競字明叔篆法極佳此題名卽競書也路公弼名允迪宋城人宋史宰輔表建炎三年正月自資政殿學士提舉洞霄宮除簽書樞密院事

宋刻孔子像贊碑

偉哉魏魏堂堂人中之龍蓋千萬世凜然如生夫豈劍佩之飾丹青之容唯其變化亡窮在九天之上九地之下將欲搏之又超忽立乎其中雖顏氏之子力窮於步武矧微

生畝叔孫武叔彼么童於戲天不得不高地不得不厚父子不得不親君臣不得不尊人物鬼神各由其道无是焉將化爲禽獸賊亂者匪夫人之功也耶毛友

昔鍾離意爲魯相出私錢修夫子車身入廟拭劍履復發懸丹書得其文曰後世護吾車拭吾履發吾笥會稽鍾離意夫圖識之語未必聖人所作姑置不問至其修崇闡發亦聖人所以聖於後世也禹錫 儒家者流反不

若道釋之徒知奉其宗士大夫畏甌福報應之說亦或誦其書與咒厭之語且繪像嚴事旦日瞻禮至吾 夫子往恬不加意甚哉人之好異倒行逆施一至於此禹錫獨恨一介寒素未能如子阿護車拭履之 得 夫子影

堂遺像謹刻 口用廣流布俾學者家置一 庶幾仰

珠庭河目之 永永誠肅以盡崇奉之萬一竊惟 夫子之道大而不能博與天地相爲悠久不必記諸翰墨而傳至若當世鉅公讚揚稱述似不爲無補故以

內相毛公讚併刻之石云宣和甲辰中秋日山陰姚禹錫謹書

右碑首列毛友贊行書十三行次列孔聖及顏子從行畫像末列姚禹錫題跋正書二十四行在紹興府學按毛友字達可西安人少遊太學與鄉人馮熙載盧襄號三俊登第崇寧間爲翰林學士方臘之亂監司不以寔聞友具疏奏朱勔怒其張皇遂予祠讀是

贊知爲光明俊偉之徒歟

宋孔耳石題名

少蘊無言慧覺道人宣和癸卯四月辛亥同來

右題名三行行六字正書字徑一寸餘左行在長興縣丁氏傳爲石林故物其石高四尺許形如人耳色黑而水紋甚細葉夢得字少蘊本吳縣人清臣曾孫晚年致仕居吳興卞山自號石林居士有石林集無言劉燾之字慧覺當是同游方外交也無言以書法名世書史云黃山谷題其續法帖云劉燾箋題便不類今人書使其春秋高江東又出一羊欣矣此刻用筆圓熟極似李北海疑出無言手書高漣卞山志列

此題名云致虛無言夢得道人凡訛舛六字蓋據傳聞紀載非親見石刻也

宋延慶寺羅漢畫像

蜀人善畫思巧筆工余昔備員京東過鄆州天寧寺得石刻住世羅漢十六尊於片雲中現種種神變持其本歸四明時有壽聖住持憲公講師愛其本命工刊諸石以傳無窮植四衆之福靖康改元供盂蘭盆日吳正平書
頃自兵火焚毀此畫不傳男口謹用舊本重刊諸石

右羅漢畫像旁題欸七行正書在鄆縣延慶寺此文首語似有脫落跋云兵火焚毀此畫不傳想重刊時未及校正耶羅漢像宋以前止作十六尊觀貫休及

此刻可証元以後增爲十八矣

宋蘇才翁題名

才翁題名洞中

右摩崖題名正書二行行三字

宋佛手巖題名

德甫必強子中 三年十月三日再游佛手落石二品

右在佛手巖摩崖正書橫列字徑二寸餘款字正書
四行字徑一寸咸淳臨安志烟霞洞有石垂下若手
曰佛手巖萬歷杭州府志巖有石筍五枝如手節下
指故名佛手又有落石巖在佛手巖石

宋子固等大麥嶺題名

子固子堅正叔

右在大麥嶺摩崖三行字徑二寸

宋道宗等靈隱題名

道宗用晦行甫己未三月三日游

右在青林洞摩崖正書一行字徑一寸西湖志云宋刻石

宋石景衡等靈隱題名

石景衡叔平杜撰升陽同游

右在青林洞摩崖正書二行右行字徑一寸西湖志

云宋刻石

宋直翁等靈隱題名

直翁翼道林夫吉甫同游

右在青林洞摩崖正書五行字徑一寸右行

宋南屏山題字

琴臺

米芾書

右在南屏山摩崖正書字徑二尺款字正書字徑二寸此刻無年月觀元周昌銘云下有琴臺云云當爲宋季所刊無疑

宋南明山題字

南明山

米芾元章 時使□□□

右正書三字字逕一尺餘左側題款一行行書在麗水縣南明山摩崖距城南三里按志崖間又有葛稚川隸書靈崇二字未知存否

宋米芾第一山三大字

第一山 米芾書姜召刻

右在杭州紫陽山摩崖行書字徑三尺款字徑二寸是刻原在盱眙縣温州瑞安縣集雲山亦有此刻此則明萬歷間錢唐縣令姜召重摩於此召字可叔廣安州人萬歷二年任有政績見縣志

宋米元章題字

第一山 米元章

右三字字徑四寸在臨海縣按郡司理恕齋班彥功
跋元章沸泉字云嘗見米南宮大書第一山石刻筆
勢飛動卽此

兩浙金石志卷七

香山縣知縣候補通判仁和周兆蕙刊
國學生布政司理問銜臨海洪瞻堦校